

ZION THUSUAK

REVIVAL CHURCH



OF GOD (RCG)

Vol. XXIV

November - December 2020

No. 124



THUPI:

Tuni hin David khawpi Hukdam pa
ahung piangtai, Lalpa Khrista chu.

Luka 2: 11

Editor: Rev. Dr. Khupkam Vaiphei

ZION THUSUAK

EDITOR:

Rev. Dr. Khupkam Vaiphei

Associate Editors:

1. Rev. Liente
2. Rev. Ngulneipau

Contributing Editors:

1. Mr. Kh. Sang Vaiphei
2. Rev. Kailum

Advisor:

Rev. Kamlam

Board Members:

1. Upa Mangkam
2. Pa S. Haupu

ASUNG AH THUTE**Page**

- | | |
|---|---------|
| 1. Editorial | 01 |
| 2. Tatna changten Christmas
Taw kisai ah thil neu cha cha
zui di te | 02 – 05 |
| 3. Bangma lo chu kahi | 05 – 08 |
| 4. Amin makah lem guattu Lalpa | 08 – 12 |
| 5. Dispensation | 13 – 15 |
| 6. The 17 th RCG Lamka Bial
Annual Joint Conference | 16 – 18 |
| 7. Gawtangkawt Bial
Kumtawp Khawmpi | 18 – 20 |
| 8. Kochuam sungah kitelna
(election) thu ah tepte dingte | 21 – 23 |
| 9. Kipakthu genna chawmkim in | 23 |
| 10. Chialna Chialna | 24 |
| 11. Pauchapna hiat di te | 25 |
| 12. Hiatsakna | 26 |
| 13. Zion Thusuak fee pia te | 27 |
| 14. Patron member leh Agent List | 28 |

Address:

ZION THUSUAK

**RCG Head Office, Hilltown, P.O. Box – 91,
Churachandpur 795128 , Manipur, India**

Editorial... ✍

Zion Thusuak latu te zosia leh, simtute zosia
Amasan lalpa Jesu min in laleng un chibai.

Lalpa'n damna ei piau va November – December 2020, issue sua kit thei in aki um ziakin damna leh hunpha ei piatu Pa Pathian chu pak in um ta hen. Amen.



Ni leh Tha, Kum leh Phat te haw chia zel in tukum le 2020 kum tawp lam chu i hun nai suk kit tau in, hun chiasa kum bul lam te ivak thil in ahile, lunghel leh lung leng tak ah hinkhua mang leh kibeï puan tin, jiagual hun chu aki tawl zing ahia, tukum in khenkhat te a ding, kumkit leh khen khat te a ding ti gual deu in, kua zosian le ipel thei lo uh taksa damlo na, taksa buaina leh taksa thina hi ahi. chuleh zia gual ma chun, khen khat in lawtinna nei in a um lai in khenkhat in lawsapna anei kit zel ahi. khen khat in kipakna anei lai un khenkhat in kaana anei kit zel un ahi. khawvel ahin a Vang phapen, a Vang sia pen, a Genthei pen, a Haupen kiti ah um ziang thei ahilo dan he dawke le chun lung awina leh muanna chu nei ngal ding lahi. Khawvel ah bangkim ituak leh ichan teu haw hi Lalpa lei leh van siampa ah kipat ngen ahi ti a dik ahi.

Tukum kum 2020 hi bang gual in lahun lamang pha na em ki ngaitua inlang, kum tunkâl ngei in Lalpa kiangah kipak thugen ding hihen lang, thupha chawi ding thu hilele, khaw ngai sawt lo in la kipat ah thathak la lak ziang lo chun kum in hung kichai khum khale la lung kimlo thei lahi ziakin, tu hi hun kipak um le hukdamna ni ahi ti gel in pauchap kawm in Lalpa dawidan bang ahem ti hên pan thak la dingin la kal hun sep pan tân. Kumthak 2021 apat ah Lalpa lunglam takin la hung khawsak daw thei na dingin Lalpan hun panpi in hun malsawm ta hen.

TATNA CHANGTEN CHRISTMAS TAW KISAI AH THIL NEU CHACHA ZUIDI TE

By: Editor: Zion Thusuak

Pathian in khawvel ahepi ma ma a, zia zia a chun a chapa changkhat neisun chu ahun pia, kuale, ama ging tapo chun, mangthai loah, kumtuang ah hinna anei zawkna dingun. Johan 3:16. (TBS)

Zia bible châng hi ineu lai ah pat ila hetmasak pen, tun le kigen pen ahi zing nalai ah, maleh zia thu hi ngun deu ah sui dit det lo ten, Pathian hi mi hepi, zangaina ah dim ahi ti ziakin, bangma na in gelkhawkna nei lo in mawk lung muang in aki muang zo gam ta ahi, ahin zia lungmuanna chu adik puai katina hilo in, lungmuanna dik a um ah, zia muanna dik chu ahi ding dawisakna nei ziakin kati ahi. a zia chu, ziatlak ah a chapa ahun sawl ah ama gingah taksangte leh athu zawm ten mangthai lo ah kumtuang ah tatna chu chang ding ahiu ti lam hi hepha lo in, ama Pathian lunglam leh dawilam te bang ahi dia aw, ka umdan hi dik ahi nam, ti him him ngaitua khalo ah, eima dawi dan dan ah hing ah umzing ten zia tatna chu chang lo ding ahiu ti hi athak in hetdaw kit pha kasan ahi. Sep ziakin hukdam hiding ahi katina vang hi diaklo ahi, gelkhial khai tiu, aban ban in vak suikhawm hi tiu.

Mihing te hi siamtil lai ah Eden huan ah khan kumtuang ah hing zing dingle gilkhial dangchak hephalo ah nekding leh dawn ding kining ting sa ah Pathian in ala kaw in, nuam tak in Pathian taw le ala kipawl zing kiho zing ahiu ti hi Bible apat mu daw leh het ahi. ahinla amau hin Pathian thupiak ala matlo zia un khawvel ah mihing te chung in taksa thina chu ahung lut ta ahi. Rom 5:12 na khan kichian deu in eihil ta ahi. Siamtil lai apat Thupiak matlo ziakin taksa thina

ala tung in, taksa thina akichai leh kichai ziang ala hile chu phama ma ding ahin, ahinla zia gual chu hilo in Pathian in hinna eipiak eima ah Thagau hinna pen hi ama kiangin kilang tei tei ding in asiam ahi zia in, Ama lunglam leh dawigual ah hinkhua kimang te vang thi leu le kipak tak in a siamtu Pathian kianglam chu zuan thei ding ahiu ti hi akichian ta ahi. chuti ahi zia in, tu ah imau ikineppi pen uh gingtu ten Christmas Lalpa Jesu Pianchampha lawpna ding hi ahi. masanga khan thingtang gam ah umte ei hawn vang vang in Christmas hi nunnuam leh gualsiakna gual in limtak in ala kimang chu ala hisek in, ahung tun kal le ngakla tak in ala ki um sam tho sek ahi (neulai chanchin) Khrista Jesu hung pian dan hi mawk pian a piang ziang dan in ala kigel kha sek in, Ama kha khawvel ah mihiam ah ahung kizil masang in Pa Pathian taw kihona leh thupukna khat nei in mihiam in hung kizil chu ala hi ngei ding ahi, a zia chu, Van apat Pathian mihiam ah hung kisiam hilo le chu zia gual a khan kum 30 lam khawvel in alen lai in thepna te atuaklai in pukzo ta mai thei ahi, ahinla Pathian ahi ziaka bailam le hi diak lo ahi, a zia chu amihiam hina kha 100% hitho ahi. thepna haksatna athawk te hawkha Pathian cha hi ziakin thawk bailam leh nuam hi diak lo ahi, a zia chu amihiam hina kha za ah za hitho ahi (100% mihiam hitho ahi tina ahi) Ama Jesu hi December tarik 25 ah hung piang dibep in gel in kawi puai tiu in, chuleh ziani bep hi apianni hun mat in mang puai hitiu in, apianni champha kimang hi adikpuai katina chu hidiaklo ahi, ka gen nuam chu ama hi Pathian chapa kei gitlo kithawina dinga Belam no gual ah mat dinga hung piang in, ama hi ka gitlo kithawina ding ah Pathian in ahun sawl ahi ti ah, tuhun inle chuleh bangtik hun inle Christmas hun mat gual in mat zing thei ahi ti kagenna ahi zawi. Ama Jesu hi Pa angah i Gitlo kithawina dingah ei hun sawl piak ahi ti hedawk in, Athisan ah thiamchang la hi te gel dawk in umthei le chun, ahung pian na chungin kipakna thu gen in

thilpiak te le bailam tak in pia dawk thei in la tin, chuleh Ama hi la thisik in thi, Ama zal in Pa ang ah thiamchang thei la hi ti hun mu chian inla latin, ti chun Pathian lunglam leh A kipakna in la hinkhua hun mang thei tan la tin, bangkim lahun mat leh laphat matna zosia in Ama Pathian Thagau taw hun le phât te le hun mangthei tan la tin. Ziagual a chun lahung umthei phat le zia lei taksa hin thina hung chang ziang ta ma le le lung kham beidawn na leh lauthawwna ding umta lo ding ahi. Zia chu ahi lungmuanna bukim nei kiti ding chu.

Unau, tuhin Pathian tatna chu chang la hi tâk in ahile bang ahem la hi ding, la he na em maw? Tulai ah gingtu tamtak keile huap in kagen nuam ahi, Pathian cha ka hi kiti, Christian kahi kiti, ahinla Pathian chate hin gual ah hing lo, Christian te um ding dan gual ahle umlo, Bang hem tia vangphatna tidi hem, lawtin na tidi hem i dawn hun tak ule la Pathian in eipiak, Pathian zal ahi kiti sek, ahinla ilawtinna te, ivangphatna te chu Pathian lunglam gual ah ila tawina hi ngai sek lo, gawlgukna, lepbawlna, zouthu te pang kawm ah ah kilaw ting, kivantpha tite ala hisek in, a ei chunla Pathian mi kahi zia kin Pathian in eimalsawm kahi kiti nuam sek, Pathian kiselna ala kimang sek, eihe te chunla kua Pathian mu le het malak sang in akam un ei genlo vang un eizapi ua, einuisan mai tasek u ahi. hawideu in kigel phai tiu unau te haw, zia gual a chun thugen hi tam deu ka hun tuak khak hi atam tho tân ahi. Pathian malsawmna idawn te, Pathian phatna zal ah vangphatna chi chuam chuam la chan te zia kin la unau la kochuam mi chanpi te dekna in la hun mang kha khan la aw, Pathian mi la hi ah, dikna hinkhua la mat zia kin ah Pathian apat malsawmna dawng la hi nak in ahi le, midangte kiangin ki show ta lo le chun le mi dang ten Pathian mi la hina hun mun tin uh min Pathian mudawna leh hetna in mangthei zaw ding ahiu in ahi, a zia kin chu mihiam te hi kuama mipha aki um puan, ngaituana pha him him le mihing ah umlo ahile, nang kigen khan mi ten Pathian phatna amu diu zawk

daltu hi thei lahi. Chuti ahi ziaik in bangma kiphat na leh kisuklatna neilo in Pathian vaihawmna hun zawk ngak inla hile chun Pathian in nang kigen sangah hawi zawn mite angin hun chawi hawi zaw ding ahi. Zia chawihawina chu Pathian le mite kipakna le hi zaw ahi. Ziaik a chun, ziagual chu ahi Pathian miten inasep ding ua pha leh kalbi masa pen zui di chu. I Pathian nei uhi mi deknan mang puai hitiu in, kisakthei pi na inle mang diak pua hitiu, a ziaik chu nangle mihiam lahi ziaik in amau gual in pukthei, chauthei, lawsamthei, dammaw thei lahi tihi hemil kin.

Tukum kum 2020 kum ah Christmas i kochuam mite taw lim leh kipak tak in mat khawm guai tiu in, Pastor te leh Upa te thugen ah kipat Pathian in bang eigen piak em ti lung lut tak in ala ngaithai tiu in, Bible i sim chun Kuan le keima ei hepi chun ka thupiak te zawm ina eiti ahi. Pathian in ei hepina naziak ah i thisik ah thi dingin A chapa khawvel ahin ahun sawl ahia, ziagual lawm ah ei hepina hi en i thuk thei ding bangma inei pua, ahinla, i thuk thei ding pen chu Ama thupiak zawp ah, Ama duai gual ah hinkhua kimat ding hi ahin ahi.

BANGMALO CHU KA HI

By:Rev. Dr. Khupkam Vaiphei

SAM N0:39: 4-5. Lalpa, ka tawpna ding leh ka dam chan di, bang chan di ahem? ti ei hiatsak inla, ka dengdel dan hi ei hiatsak tan. Ngaitia, ka dam sung hi khutphek bawk chan bep in la siam a, ka kum le la mitmu ah chun bangma kham ahi pua, mitin hi aphot lai tak unle a pum un bangmalo mai ahiau.(TBS)

Masang ah tekse te chun siksa hekhalo ten bangma ahepha puau atiu u taw, Gul chuk khaklo ten Gulgu a hekha puau ati sek u kha ka ngai

tua le dik hi kasa ma ma ahi. Amau in ala gen gual un tulai inle Thagau lam Pianthakna leh mitvakna neikhalo ten Pathian thu hi ahe dawk zo puau in ahi. thagau ah Pianthakna diktak nei ten, khawvel hi banggual in um ahi ahiau in, chuleh ama leh banggual mi ahi em ti aki hechian in, ti chun bangkim ah a khawsakna mun ah ten, asepn mun hi henla, khawitak mun in um ziang lele mihiam dengdel dan ahe thiam in, kisuanna him him nei lo in bangkim ah Pathian zai ngak in akhaw sa thei hi ti hi adik in pawm tâk ahi.

Mihiam te dam kum hi kum 90 dam di hita male hinle hetmanlo kâl in beipai tho tho ding ahi, Hausatna leh nawpsakna te haw hile asawt ding khatma le umlo hina pi in, mihiamten zia chu ki ngaina tei tei ziang, zia i ngainatna ziakin Pathian taw kilemna kisubei thei ahilam hephalo in muangtak ah i um kan um thei ahi ti hi ka he ahi, a ziak chu keima ngei inle ka del, ka ngainat khat leh kala hi khat chu ala hithe ziakin ahi. Zia thu ahin kuama le ka awimaw thei diak puan, thiammaw le ka chan diak theilo ahi. A ziak chu Ama Pathian mapuina leh hopina ala he khalo ten a bawl ding mawng ule, adel ding mang uh ahi ti chu aki chian ahi. I kam in bang cheng gen in, akilawm ding tiang thaw male hinle, Ama Thagau Thiangtho chenlona hi nana chu, aumpa nasep zawk chu hung kilang tho tho sek ahi. I Taksa leh I Hinna pumpi hi eimân i dawigual gual in i bawlthei ding hitama le chu bangma zosia chu bawlthei hivek ding ahi, ahinla, i hinna te hi eima khuta um ahi lo ziak in, bangma ikisuanpi ding a um keilo ahi. Athunei pa eisiampa ipau Pathian in bang gual ah um dingin ei dawî em ti hi ngaitua thei dingin, bangma ihi lo dan kihe dawk lehin diktthei pen ding ahi. Pathian mitel Pu David ngeikhan le Pathian ma bangma ahilo dan ala gen ahi hiti hin, “Lalpa, ka tawpna ding leh ka dam chan di, bang chan di ahem? ti ei hiatsak inla, ka dengdel dan hi ei hiatsak tan. Ngaitia, ka dam sung hi khutphek bawk chan bep in la siam a, ka kum le la mitmu ah chun

bangma kham ahi pua, mitin hi aphot lai tak unle a pum un bangmalo mai ahiu.” Ala ti ahi. Sam 39:4-5.

Tulai natna kigen pen Covid-19 hipi ah natnavei possitive te thina tuakdan ah kipat thichiat chiat lele Covid-19 natna ah thite khu bangmalo mai ihi dan uh akilang diak in ahi. Aziak chu kuaman le chutpi ah a itnau sulang thei ta lo, gancha thi ki kawidawk bang ziang in kituam chak in thânmun lam kizawtpi ahita mai in, mitampi a ngâina tenle zuithei talo, bangma chu kihilo ahi ma ma ahi. Ahin zia chu mihiam ngai ahi, eimau ngai in kua hile isuapi, i unau taksa thina tuak te chung ah i hepina isuklat thei pen chu akiangnai ah chut ah kâ ding, achung thu kilawm deu ah holimna nei ding, thilpha leh hawi kilawm te thina chung hilele vakbawl kha ei mihiam te lungdamna mai chu hi ahi. Ahinla Lalpa mitmu in Covid-19 natna thi te taw kibang veve ahi. A zia chu Khrista hinna neite thina chun lalpa akipak in, alopi ahi, ama chu Covid-19 natna thi hi henla hile le Lalpa mitmu in alopi tho tho ahi. Amabo, Khrista ah hinna nei lo mi ahi chun banggual in kilawm tak in aluang chung ah thugen in na sem leu hinle, Lalpa kipak diak puan tin, Lalpa lungawi lona chu achung in tung tho tho ding ahi. Pathian in nangmau lunggel le kei lunggel kibang lo ahi ati ahi (Isai 55:8)

Suapi te haw eimau haw hi bangma ihi puau ve, khawvel ah mi Haupen hinlang, A Pil pen hi jiang le hin le, i Hauna leh iPilna chun Lalpa kipak di ahi puai, chuleh aVai pen leh a Genthei pen hi ziakin le Lalpa kipak diak ding le ahi diaklo ahi, Lalpa’n Hau leh Vai, mi Mawl leh mi Pil akhen chuam lo ahi, kuama zabawl chuam le neilo ahi (Rom 2:11). Nikhat ni le khen chuamnei lo Pathian angin puklut tho tho ding ihi kihiat in, tuhin Ama taw kicham ah Ama dawidan lampi ah kalsuan kipat chu kumtuang damna pen ahi. Khawvel taw kiho thei hi Pathian melma ahi (Jacob 4:4) Bangma kihi lopi ah

kithupisak, kilung taksak ti te haw hi zingle eibei dawnsak tu hung hi ding ahin ahi. Unau Pathian lanei lo chun bangma hilo lahi.

Thagau ah Pianthakna diktak nei ah a Hinkhua kikhel tak tak ten Thagau ah mitvakna anei tâk ziak un bangkim ah Pathian dawidan in ahinna aki mangcha thei un ahi. Ziak a chun Pathian hi muchian hi tiu in, i um ding dan chiat un um maitaitiu, chuti le nang kei ti ah ki engsia ki muda ti te le umtalo ding ahi. Lalpa Pathian kipakna hi bang ahi em ti hedawk in, zia lei taksa bangmalo mai kisanpi ah, Lalpa lung tuaklo dingin umtei gaw lo ah Ama kipakna in la hung umthei na diu in lalpân athu kigen te hi hun malsawm ta hen.

AMIN MAKAL LEMGUATTU LALPA

By: Upa Lalboi, Gawtangkawt

Hun lenite hung liamin, sepleh bawl buaitak mai ah hinkhua himatlai in, khawvel buaina jiaka leh natna jiaka mitamtak thinatuak ah leh, banggual ah hinkhua mat toujel ding ahem tia ilunggellai in, khristmas hui ahung nung pan ta, mi khenkhat lungthim chu Bethlehem bawng in lam ngan ilungthim teu kai hei in aum pan ta. I lalpa jesu pian dan thu leh hung kipat dan khanggui thu hi amak in lungthim sukha ma ma ahin, jiathu hin ilungthim u vak gel khawm hitiu in, vaksut khawm hitiu tin lal Jesu min in.

Pathian lekhabu thiangtho ah, chapa hing in tin amin in jesu lasak ding ahi, Amachun amite gitlonau apat in hukdawk ding ahi ngal in atin", (matt 1:21)

Nidanglai in ipu ipaten nungak mou ding a et phat ualeh suanleh pak hung nei ding, khanggui kisimna ding ahi takjiak in, chip chiltak in le

feltak mai in a ensek u ahi. Amou ding bep enlou in akhanggui natiang le a enjuipek nalai sekui.

A et dan tangpi ahileh , melpuam melhem nabei a khanggui ua natna phalou neihilou kausia namsia te hilou mitleng te hilo, meithai ta hilo melma nei te hilou, minsiatna nei te hilo, khut themneite hilo, ti haw hi ahin, jiatianga hung pass thei kiti chu mai2 hilo ahi.

Tulai ahin vang jiagual lawm a chip chiltak in a ki en ta pua, ikilungsiat pouleh akhawkpuai tin. Himaleh nidanglai ah ala et dan u chu tulai inledawi um pen chu ahi thotho nalai hi. Aleh banggual khanggui Lalpa Jesu'n ahuntel ah, athusim ding bang gual ah kijik ding in ahun tel em? Tihi vak en hitiu.

Thuthunglui hi hen Thuthungthak hi lehTuhun tiangin le khanggui kisut nan kua man numei apat in khanggui asutngailo u ahi. Himaleh, " Amin maka lemguat Tu lalpa chun maktak mai a lemguatna achun akhanggui hung kisutna ding ahin numei pali ahuntel ahi. Jia numei pali tehi min phatnanei ahem, gualchungchuang tile hikit lou nalai, Jiamal lak ah min siatna nei, mihing mitmu jiang ah le ahinkhua le akhanggui thusim uh dawumlo taktak nei ngen, amin uh i gen maileh le thilpha him him tawh kimek dantheilo, timul ki thaw um, zi ding cha ding ah dawumlo, ikhanggui hung kisimna ding ah le dawum keilo chu, I lalpa Jesu'n van apat ahun enveng veng ah akhanggui kisutna ding leh ama tawh kimek dan(identify) dingin ahuntel mai ahi.

Jesu'n akhanggui kisimna ding ah numei ahuntel te thusim chawm (Matt.1:1-8)

TAMAR- 'Atekpu tawh chane' Tamar hi judah chapa Erji ahi. Erchu Lalpa mitmu ah migilo ahi zia in cha neimanlo in a that tai. A

suanmanlona ding in judah in achapa neu jaw Onam kiang ah cha nei ding ah a sawl kit a, himaleh Onam in cha aneipi nuamlo zia in a chi chutual in a luanthak saksek hi. Zia a thilbawl dan Pathian mitmu ah huat umtak ahiziak in Pathian a lung ana, a that kit tai. Judah chun chapa khat anei nalai ah himaleh ziachu tawh kicheng kit leu thi kit khan nati zia in Tamar chu apa inlam ah asawl kit tai. Chawmkhat zaw in Shua chanu Judah zi chule a hungthi kittai. Azi thi nung in Timnah khua lam ah a Belam mul met ding in achia ah a Belammul met ding in achia ah ziatak a chun amonu Tamar chu Nawchi juakahisak ah ava luppi ah cha ahun nei ua amin Perez ahi. (Gen.38:1-30) zia a "tekpu pa tawh acha" apat in Jesu khanggui a hung kisut kit ahi.

RAHAB-"Jericho ah Nawchi juak "Minthanna dang neilo Jericho ah Nawchi zuaknu ti ah mi zosian a hiat, Jericho entha ding ah Joshua in mi a sawllai ah ala panpitu chu ahi. (Joshua 6:25) Salomon in akichenpi ah, Ruth pawsal, Boaz hung pianna pa ahikit hi.

RUTH-" Moab numei"Lot in achanu teni tawh a zukham pet in chapa ni anei a, a lianzaw nu tawh ahina chapa min chu Moab ahi, (Gen 19:30-38).Ruth chu Elimelek chapa khilion zi ahi. Cha anei masang un a thisan hi. (Ruth 1:5) A pawsal thinung ah Boaz tawh kichengkit, (Ruth 4:10) zia aki pat in Jesu khanggui a hung kisut kit hi.

BETHSEBA-"Lengpa David zi"Uriah zi Uriah galkap kal ah lengpa David in ala tatsualpi (2:Sam 11:4) Bethseba in nau a hun vawpnung ah a gitlo sel khuna dinga a pawsal Uriah thapiak kit (2 Samuel 11:17) Uriah thapiak thinung ah a kichenpi a, chapa a neikit Solomon leng ah hung pang hung pianna nu ahi(2 Sam. 12:24) Zia kipat in Jesu khanggui a hung kisut kit hi.

Jesu'n anu apa ding leh a pianna ding tawh kisai ah athil telte:

A pianna mun ding ah a hun tel Nazareth bangtik lai ah thilpha pian ngailo namun (John 1:46) ala hi. Ama hun enkawltu ding ah a hun tel apa Joseph Nazareth ah Thingthiam, thingkuang siampa kitisek (carpenter) mai ahi.

Ani leh apa Mivaicha Neizolo Mose dan in nausen piang masa pen chu kisuk thian na dingin halmang thillat ding in Belamno kumkhat tingsa ahi ding ahi, Belam nei zolo ziaka vakhu pani bep kisukthian nadinga piazo ham ham nu leh pa(Luk 2:24) ahiu.

Alupna dinga ahuntel gan ankuang:Ama masang ah kuama ala lup a kihe khapua, amanungin le kuama a lum hi ti le akihia diakpuai.

Apian ah hung ve ding mi nuainung pen belam chingte.

Zia achung ah numei palite thusim hi nang insungah lazi, la suapi nu, la nu, la ni ahem lehnang hung pianna khanggui ah um dingin la dawidiam? Chu leh ahung pianna ding ah ahuntel te hi nang a ding hileh bang tin la ngaidiam? Mihing kuama dawitel na ah piangi um pua, dawitelna ah piang thei ding kihi leh ziagual khanggui teli um ding ginchak a umpuai. Lal Jesu hin vang ahun envengveng ah, ama dawi tel na ngei ah hung piang ahi. Bang zia ah Lal Jesu'n ziagual hi ahun telmai ahi diam leh? Ti dawt na dawn hun abailam pen chu mipha te hawl ding ah hung kahi puan migilo te hawl ding ah hung kahi zawi ati hi ahi(Matt.9:13) . Lalpa lemguat dan hi amak in hiatthiam ahak sek ngei maw. Lal Jesu'n akhanggui kisutna ding leh aki hiat khawmpi ding ah ahun telte hi vak ngaitua tia? Mihing in, ikihiat khawmpi (identify) leh kiguizawp pi ding ah idawi chu milian milal, mi hausa minthan nanei, leh gualchung chuan na neitei dawi ahi. Lal Jesu hin vang minuai nung mi hiatkham lo, migilo te leh panpi ngaite ahuntel ahi. Nang leh ken dawi itel theina ding in aman dawi umlo zosia ahuntel ah, min thilphalo zosia tawh nang

ahun etdenlo (identify) khawmlona ding in ama thilphalo zosia tawh a hung kimek den(identify) khawm ahi.

Khuakhat ah la pawl asakua leh mikhat chu a aw alengtalua, alawipa chun "khaih lawi awl bawl deutia, eingaw khawm khan' au" ati, atigual un Jesu hinkhua ah ama tawh ki identify khawm ding ah atel thilte hi ivak et leh, eihun khua leh ikhanggui ah ithusim ding leh identity ikibawl khawmpi ding ahi khak ding lau um hial ngen ahi.

Thu khakna zia achung a itaklatte hi Lal Jesu taw a hungkizawp masang un, a hinkhuau hi dawi umlo hi maleu, Lal Jesu tawh a hung kizawp tak nungun vangdawi umlopente le dawi umpen a hung suak mai sek ahi. La hinkhua kinepna neu zotalo, sukkhialna dim, nangma lamkai ah phatna him neitalo, mualpho nadim,kingaisia gawp, kuaman le bangma ahun ngaitak lo le la himaithei hi. Himaleh Lal Jesu'n ahuntelte hi avel in vakngaitua kit tia? Zia te gual hin Nang le ahuntel la hi. Kipak in limin; tinglotak in ei sim ta ahi. Chun kum tamtak Christmas ala mang ta Christian te hin tukum Christmas imatnau ahin ziagual lungthim christa a um chunei in, gitlona neilogual ah chanchinpha kiko pi lo in, migilote gual ah um in kinepna neitalote, kithuapi ngaite, phatna nei lote, migilote hukdaw ngaite leh panpi ngaite tawh kimekden in a kiang un zia chanchinpha hi gensawnthei ding in Lalpa'n ei malzawl piak taken. Amen.

“DISPENSATION”

By: Pro Pastor Lianboi

KHUA HET MASANG (INNOCENCE)

Thumapui: Sermon message beklo in dispensation 7 lak a 1 na, mihiamte khua het masang (innocence) chungchang ah sermon panpitu leh khua het masangthu het khamkham ah bible thiam hawn eikawkmu dan ah hung kisulang ahi zawi. Phatchuampi chiat ding in simtute Zosia lungthim mangcha chiat ta hen.

A.Go ching ah kingansia chu Adam ahi:

Pathian in nisua lam ah Eden huan ala siam chu a enkawl ding/ a chingtup ding leh a lei thothiang ding in Adam chu ala kawi in ahi. Zia khuahet masangti chu mawna neilo hun (Innocent) Pathian in zia hun ah Eden huan a ngaktup/achingtup ding in a ngansia chu Adam ahi. Ahin,zia phat laia hinvang Evi a um naipuai (Gen. 1:28-30).

1.Pathian in a lunggel a phuan daw (Gen. 1:26-27): Pathian in a lunggel ahung phuandaw chu ama lim leh mel bang pu, mihiam a siam chu ahi.

2.MihiamtePathian limpu a siam ahi dan:

(A).Mihiam hi Pathian in ama hinna hu athalut piak ah, ama lim ah ahungsiam ahi. Zia zia ahin, Sam 139:14 nachun a thilmak bawl zia ka thagau in ahechian tai tin David paknala'nagen hi. Chulehkei man nangma ka chawihawi ding ahi, aziak chu mihiam hi Pathian thilsiam haw lak ah kidang pen leh Pathian lopina leh athupi dan phuandaw thei pen mihiam ahi.

(B).Mihiam hi Pathian chawn phatna lim ah siam ahi: Aziak chu, mihiam hi gitlona neilo na awlna bei leh buak beklo ah siam ahia, zia chu Pathian lim ah siam a hina chu ahi. Pathian in Adam chu mawna bei ah asiam bep hilo in ama tawh kimaitua ah, kihothei ding in le asiam ahi, himaleh, Adam chun a chawn phatna leh athiamna chu aman akisuk bei a, akisuksiat thei a siam chu ahia, Pathian thiamna leh chawnphatna vang ahi leh asia theilo, a chulthilo ahi.

(C).Pathian thupiak leh teptena haw (covenant) Gen. 2:15-17:

1.Adam chu Eden huan chu a venbit a, a ngaktup ding, huanlei chu a sukthianjing ding ah thupiak ahi (Gen. 2:15)

2.Eden huanlai lung ah sia leh pha hetna thingga chu neklohial ding, a neknini leh thi jiang ding tithupiak ahi (Gen. 2:17) ahi vang in, thingga adang zosia vang chu nekthei suakdinga thupiak ahi (Gen. 2:16)

3.Cha leh nautampi ahing a, leisiat chung a luadim set ding ahi Gen. 2:28)

4.Adam phat mat khanga chun mihiam in anche lohing jiang an ah anei ding thupiak ahi (Gen. 1:29-30). Zia hunlai a chun sa leh ngavang nekphal ahi naipuai.

5.Zia hunlai a chun Pathian in mihiamte chu awgit in alako in ala kihopi hi.

B. Adam in kitepna a zui zolozia ah gitlona bawl:

Zia Eden huan khuahet lona phat sung a chun Adam leh Evi chu bangtik ah Pathian tawh kipawlkhawmua, Setan hi engsia thepthak ah ala um ahi diamti hi Bible in a genchiana mu ahilo zia in hettthei

ahi pua, Adam leh Evi Eden huan ah thepthak ah a um masangua chun Van ah lucifer chu Pathian tawh kidona thupitak, ala um ahi tai. Zia ziaka hin Pathian in Lucifer chu Van apat in leisiat ahin ahungnaw thak ahi tai (Rev. 12:7-8)

Zia phat ahin Lucifer in leisiat chung ah chutna ding mun ahun hawlta'n, Pathian cha teni Adam leh Evi umna Eden huan chu ahun geldawk tan ahi. Lucifer chun a pukna point achun Adam lehEvi thepthak ding guan pan ahung la tai, Upa ten Insai man ding in Gamsai atigual un Adam thep thakna dinga chun Evi ahun mangcha tai. Evi kiang a chun Lucifer chu ganhing haw lak ah ching pen, dawha thuk pen gul sung in ahunglut in Evi kiang achun thingga haw hi la nektnei suak u ahi nam? Tin avakdawng in ahi leh ama nu'nahun dawn but in, a lailung ah sia leh pha hetna thingga tilo adang Zosia la nektnei u ahi nai ati. Ahin, a lailung ah sia leh pha hetna thingga vang chu la nekniniu chu thi ding lahiu tin ei gen piak hi tin a Lucifer chu a dawnbut hi. Lucifer in thilo e ama gual ah asia apha la het ding u ahi zia ah agen ahi zawi tin agenpiak le Evi chu a thuzaw in ane tai. A pawsal Adam le apia ane tai. Zia phat achun setan chun Pathian chu ka zotai tin anusia tai. Adam leh Evi chun Pathian thupiak haw chu amat tak loziak un Eden huan thianga pat in theiga ne kit khana atiziak in pawlam in a nawdawk tai (Gen. 3:22-23; Rome 3:23, 5:12, 6:23)

Suapite haw dan khatto leh Evigual ah Pathian thu sang in Setan thu hawi zaw leh sang zaw kawi khaitiu, chinthei in ti hi tuni a ding in thu chaina hita hen, simtute Zosia Lalpan a thusimgual un malsawm ta hen.

THE 17th RCG LAMKA BIAL ANNUAL JOIN CONFERENCE

By: Bial Secretary

REPORTNA CHOMKIM

- ❖ Amun: HQ Church Hilltown
- ❖ Ahun: 16th – 18th October, 2020

Khompi sung a speaker a ei pan piak te:

1. Rev. Kailum MTh kangvai
2. Tv. Boison MTh kangvai
3. Tv. Lalthamuan M div T munjang
4. Rev. Khupkam Exe secy
5. Rev. Liente Bialtu pastor

Amau sia hin thupi: **“Hun kipak um in ka hung ngaithan jing in”**, Korinth:6-2 leh **“Hun kipak umle hukdamna ni”** ti LTT NO:352 laapi mang in,jia te ni hin pathian thu leh a bialte khantou na thei tampi ei gen piak un,thagau lam ma limna le kana te umlou ma leh pathian thagau in ima teu pui in nomtak cha aki mang chai in, program hun sung in competition na RYF lam te a pat in jat chuam2 ki tai tek na te Dt :17/10/20 in aki nei in, kikhop pel Dk : 1 pm in competition na te mat ahin,jia competition na en dik a ei pan piak te chu 1.Tv Dadam kangvai 2.Pa B Athang Hilltown church 3. Tv lunthang T munjang

Amau sia nuai a hin laa Quartet leh duet le bible Hebrai : 10 : 19-30 te haw hi ki demna a ki mang in Dt : 18 pathian ni ki khop pel dak 1 pm in Gen election na chu Rev liante, Rev khupkam, upa lalcha leh

Rev kailum amuan sia hin 2021-2023 chan ei tel dawk piak teu chu jia a nuai asia hi a hiu.

BIAL TE:

1. Upa Lamminsiam of T munjang – Chairman
2. Upa Kailiandou of Kangvai – Vice Chairman
3. Pa B Athang of Hillton – Secretary
4. Pa Tonglal of T munjang – Assistant Secretary
5. Pa Thanga of Vanghoiphai – Finance Secretary
6. Upa Jangthang of Hilltown – Treasurer

RWF TE:

1. Nu Lily of T munjang – Chairperson
2. Nu Hoilam of Kangvai – Vice Chairperson
3. Nu Niangneu of Hilltown – Secretary
4. Nu Samboi of Vanghoiphai – Assistant Secretary
5. Nu Kikim of Hilltown – Finance Secretary
6. Nu Siammi of T munjang – Treasurer

RYF TE:

1. Tv Naulun of Hilltown – Chairman
2. Pa Paulim of kangvai – Vice Chairman
3. Nk Nengpi of T munjang – Secretary
4. Nk Jemmi of Hilltown – Assistant Secretary
5. Nk Lily of Hilltown – Finance Secretary
6. Nk Nenei of kangvai – Treasurer

Election na mat jaw in tel daw a um thak te Rev kailum in pauchap na nei piak in lawman hawpna le nei jawm in Nitak dak 5pm kikhop na in alui leh a thak te ki khut san na nei in Bialtu pastor in

pauchapna nei piak jaw in, lalpa anthiang hawmna leh Bial khompi khak na taw thua in hun chu suk tawp ahi tai.

Chun tuchung RCG Lamka Bial kumtawp khawmpina in kimatchakna zosia eizik lut piaktute/Recording secretary te ahiu le:

1. Tv Manglallian, kangvai
2. Tv Lallunthang, T.Munjang leh
3. Tv Naulun, Hilltown te ahiu.

Lalpan kumkit le jia sang a nuam leh hawi jawn Pathian malsawmna chang jaw diak ding in imau pui ta hen.

GAWTANGKAWT BIAL KUMTAWP KHAWMPI

By: Bial Secretary

REPORTNA CHAWMKIM

- ❖ Amun - Mualkon
- ❖ Dt -15th – 18th October, 2020

Khawmpina sunga speaker a ei panpiak te ahi leh

1. Rev. Pauneu, Bialtu
2. Upa Shila, Bewlahland
3. Upa Tinthang, Mualkon
4. Upa Lalboi, Gotangkot
5. Upa Songlianthat, Adm. Secy RCG

Amau sia hi ahiu.

Khawmpi thupi ahi leh **“Pathian Thagau Thiangtho chu hi lungngai kiu in”** Eph 4:30

Lapi – **“Thagau thiangtho huiva num nem”**

Pathian mapui na jalin khawmpi mat ahi jing lai in Dt 16 ni jan kihop na in Pathian thagau nasep le ahung um in Nk Winsky Gotangkot a um Pathian in mang chan lawi upate sia biak in sung sagi vei vel na leh biak in mai lam crss phung sagi vei vel na ahung kit in chun mipi jousian Pathian kianga thupha choina nei in chun jia lai tak achun TV lemboi le thagau malsawmna ahung chang kit in ahi.

Chun Dt 17 ni jingkal devotion kikhop jaw in Bial Khanglai te mapui nan Kidemna item bible te lasak na te short sermon te ho bol ahi kit in ahi.

Chun sun hun in bial sung Election mat ahin,

Jia na hin Election Commissioner a ei pan piak te ahiu leh 1- Pa Mangcha Gotangkot leh 2- Rev Pauneu bialtu ahiu in. chun amateni mapui nan election mat ahi dungjui in, Gawtangkawt bial sunga

Lawi upa dinga kitel dawk te sia mi Jia cheng ahiu.

BIAL TE:

1. Upa Lalboi, Gotangkot – Chairman
2. Upa Thianlal, Bewlahland – Vice Chairman
3. Upa Mamang, Mualkon – Secretary
4. Pa Liankham, Gotangkot – Assistant Secretary
5. Pa Manggou, Mualkon – Finance cum Treasurer

RWF TE:

1. Nu Avak, Gotangkot – Chairperson

2. Nu L Hoinu, Bewlahland – Vice Chairperson
3. Nu Lhingboi, Mualkon – Secretary
4. Nu Jemy, Gotangkot – Assistant Secretary
5. Nu Thianhoi, Mualkon – Finance Secretary
6. Nu N Hoinu, Bewlahland - Treasurer

RYF TE:

1. Tv Momoi, Mualkon – Chairman
2. Tv Haulian, Bewlahland – Vice Chairman
3. TV Suanlian, Mualkon – Secretary
4. Nk Thiamlaniang, Mualkon – Assistant Secretary
5. Nk Nenei, Bewlahland – Finance Secretary
6. Nk Thiampui, Gotangkot - Treasurer

Amau sia hi khanglai lawi upa kitel thak te ahiu.

Tu chung a khawmpi na election kibol na result ahi. Dt18/nin sun kikhop na in Upa songlianthatng Adm secy RCG leh Pro Pastr Lianboi of Leimakhong aum ten ahung uap piu in chun Upa Songlianthatng in bial lam te tilkhauna le Pathian thu cha ngainop um ma2 gen in chule Pro Pastor Lianboi in le hun chawmcha bial te chung a kipak thugen na le tilkhau na thu genin kipak um tak in sun hun matkhawm ahi. Chun hun tawp jan in khanglai lamte kidemna kipakman thil te hawpdaw na kin leh chun lawi upa khenkhat a port felio tuk na hung ki chawl te ho leh akum hung tingta pension tate Memento piak na te aki nei in chun hun nunung pen in Bialtu pastr Pauneu in Thupi Genna leh Lalpa anthiang hawp na kin mang in lunghel um tak leh hawmthaw um kisa pum in Pastr Pan MALJAWLNA Pathian kiangin dawn in Gawtangkawt bial kumtawp KHAWMPI chu matchai ahi tai. Lalpan Gawtangkawt bial te kumkit khawmpi mang kit thei dingin lalpan amau pui tau hen.

KOCHUAM SUNGAH KITELNA (ELECTION) THU AH TEPTTE DINGTE

*By: Rev.Dr.Khupkam Vaiphei
Executive Secretary RCG*

Mihiam khat hina ah tulai ah kalung gel khat hung kilang a um ah, zia chu Kochuam sung, Pawlpi sung leh department sungah mawpuakna term ahung kichai phat tak le mawpuatu ding athak kitelna ahung um sek in, kua kochuam leh Pawlpi inle anei chiat, zia kitelna (Election) hin teldaw ah umte leh teldaw lo ah umte umdan leh lunggel dan te hi kamu in bang zia ah dia aw tin kala gel gel sek in, kabuaipi ma ma khat le ahin ahi. A zia chu teldaw ah umten Pathian in eiteldaw eiguatzawk hina ti lam ngaitua lo in, kei ama sangah ka thiam zaw, kapha zaw, chuleh matthei kahi zia kin telkai kahi ti in kithupisakna lam in lunggel nei a um un, ziagual a chun, teldawlo, kaizo lo ten le, mihaw hin kei ei dawilo mawng mawng u ahi, ti in lungthim kingaisiatna te, thangtawmna te, chuleh kochuam sung kivaipuakna te suksiat ding, akaite nasepna suk hatlo ding ti lunggel neikit in a um un, hiti chun nawpmaw tak in hinkhua amang un, mi khenkhat vang vang biakin le kikhawm peitalo tile a um kit un ahi.

Kagen nuam pen chu ahile, ei kochuam nasem te hin, mawpuakna nei ah telkai ah um in umlo le henle Upa leh member ihina bei diak lo ahile, bang atia mawpuakna inei lophat le mawpuakna nei te kipakpi kithuapi lo ah sukchau ah suksiat ding lunggel nei ihi deu em maw, achang leh committee ding akiti lele committee na ngaisak lo ziang, kivaiahawmna ding mun mawng mawng ah chiada ziangthei le a um kit un makvang kasan ahi. Khawvel Politics lam ah

MLA/MDC kitelna ah kaiten Assembly Hall/ Meeting Hall mun ah kivaihawmna angainau ah, meeting na inle member khat ahi ziaikun alothei lo in apan tei tei diu ti chu amau mawpuakna ahi mai hi. Ahinla ahung kailo phat uale chu member hitalo chu Assembly Hall in luttheina aneita lo ahi, ziaak a chun akailo te vang kivaihawmnan apangngai lo uh ahi. Amabo, ei gingtu te, kochuam mite hin puitu dingah titlo na vanei tama leh hinle, biak inn kikhawpna tite haw ahin kuaman eidal pua, kochuam member gingtu khat chu kihi zing tho ahi. ei haw lak vang vang Mission sungate, Bial sunga te, member kihizing tho ngal, ahinla mawpuakna inei lo man ah, ki meetingna ngai khok talo, min ko ko lele kihetlo sakmai,kabei in bang abawl dawk awm, eidawilo ahiule tite bang lunggel nei ki um nalai. Mimak chu kihi ahi ti kigel phai tiu.

Unau te haw Kochuam leh Mission iti te hi nangah hilo eive, Pathian kochuam, anei tu chu Pathian himai ahi. nangin nangah dan in lagel ziaikin, nang phatchuamna dan in la gel ah, midang in apuak phat le itsikna neikha sek lahi ti ngaitua in, Pathian nei mi lahi chun, Pathian kochuam buaina ding le thina ding in lunggel nei ngai ngai lo ding lahi. A ziaak chu kochuam kivaihawmna leh thupukna te ngaisak lo mi chun Pathian anei puai kati ahi. Nang in ami te la en ah, amite ziaikin amau phat chuamna ding le, min phatna ding bep ahi, bang dia kapang puai, kasem puai lati ahi, kochuam hi mawpuakna tukte ah hidiaklo ahi. Pathian ah ahi ti hechian le chun hiti gual ahin thabei sam puanla, kingai tua in, nangma le Pathian mikhat, member mamaw leh pawimaw khat lahin ahi. kikawi kang him him kin, chairman/secretary /treasurer leh executive body member lahi loziakin Pathian in amangcha nuam puai ti di hi him him lo ahi. Mihiam khat lahi nak nak le Pathian mitel, Pathian cha kahi ti in ki kawi le chun, kochuam itite hi Pathian mite umkhawmna ahi. Pathian milo te apangthei ngailo mawng ahi. Nang Pathian mi le sa hilo

maw, bang atia lungneu ah setan matchak dia um la hi em, phaten kichunlang, kigel him him tia, tu ah la din mun hi adik ahi na em. Adang genbe talo in chan ahin nga maitang ka, agelthei lo la umkhak ua ahi chun, kidawt tua thei ahi. Lalpân hun panpi in hun umpi zaw taken.

KIPAKTHU GENNA CHAWMKIM IN

Keima bangma hilo, hetna leh chuti lawm ah mi khel ah vahe vanei le hi diaklo, maleh Pathian zal ah RCG Nu leh Pa ten tu chungah Theological Studies & Research University- Andhra Pradesh- India, te nuai ah Dimapur branch ah **Doctor of Ministry (D.Min)** degree kava lakna chungah lei kipakpinaw leh lei kithuapinaw taw thilpiak te lei piak nateu chungin kakipak na thu genlo thei in kakigel pua, ziaak a chun Pawlpi leh mimal ei hung kipakpi tu te zosia chung in kipak thu ka hun gen in ahi. Lalpân laki sennau hun hetpi hen la, ale tamtak in hun malsawm zaw ta hen. Kakipak takzet hi. Lim hawle tâk daw kanuam hial ah, maleh tâkseng lo ding akihi ban ah, mimal kisuklatna gual ah ngai khak ding venna in limlak te haw le i Whatsup group ua kisua, kitâklang te kha ahi mai ta ahi. Lopina lalpa ah hita hen. Amen.

CHIALNA - CHIALNA

Revival Church of God (RCG) Kum 50 tinna (1970-2020) Golden Jubilee 23th-26th. April. 2020 sungah nithum sung mat dingah bangkim bawlwaw nungah Igam ua Covid-19, Corona Virus natna ziakin mangthei talo in tha sagi lam thip veng vung in ila um nung un, i gam government in Lockdown leh Curfew hun ladawk in SOP dan nuai ah mangthei ding din mun in i um thei tâk zia kun ikipak un ahi. Tunle bang gual in ahun hei lamdang deu em ti chu het hilo maleh pauchap zing kawm in ahung tung ding tarik : **28th-29th. November.2020** sungah T.Munjang vangkhua ah nikhat sung ah dingin Program te siam thak ahia, Ziana hin kua zosian le thanuam tak in, lunggel kituak tak ah Chawihawina Lalpa pian Lawmkhawm chiat thei dingin kising sakna nei chiat dingin chialna avel in ka hun nei ahi. Program le imu gam tâk ding u kakinem in, program hung kihawm a khan Jubilee Thupi ala kikawi hemil khân, maleh hawpdaw nung in Golden Jubilee Thupi ding ahung ki tâk lang ahi. **Thupi “...Ama kiang a chun Lopina kumtuangin umzing taken, Amen.”** Ti ahi. Rom 11:36.

Jubilee hi mangthei ngei dingin Pauchapnan hemil puai tiu in, apang ding inle kisa pha chiat hitiu. Lalpân i pauchapnau ei hetpi ta hen.Amen.

By: Golden Jubilee Celebration Committee RCG.

PAUCHAPNA HIAT DITE

- RCG Golden Jubilee dâk khen ging thei tading din mun ah ivak umthei na chung un kipak thu genna nei hitiu
- I Kochuam sungua Covid-19 natna ziaak ah buaina tuak hial umlo ah Lalpa umpina chang zingthei dingin dawn hitiu.
- Kochuam tin in mission Head Office lam ah submit ding dawl te akim alim in ahun submit ua pankhawm thahatna ahi jiaakin Pathian lalgam a dingah isep nau hat jaw diak in pan ilakkhawm jel thei na diu in pauchapnan he jing hitiu.
- Bulak hun ahi taw kitawn in, lo bawl zosian akim alim in bu alak ua, insung kiting tak in nuam ah hinkhua amat thei na diu in pauchap hitiu.
- I kochuam sung ua sepna muthak ipun be zel thei na diu in dawn zel hitiu.

HIATSAKNA

Zion Thusuak hi kum khat ah lakman Rs, 100/- bep ahin, apia nailo hun piak gawleu chun kipak um ina.

Kuataw bang mimal sawm ah khat hi henlang Zion thusuak subscription fees hitale gal a pat Bank ah hun thun nuam ten anuai ah Bank min leh A/C Number ahin hun thawt leu chun kipak um ina.

Account Name: **Revival Church of God**

A/C 11343704608

Bank name: **State bank of India,**

Churachandpur Branch.

IFSC SBIN0006182,

Branch code: **6182**

Zion Thusuak tukum ah dingah Oct-Nov thasungah kumkhat lakman fee hun pia te.

Pa LM Vaiphei	-	S.Munnuam	- Rs. 500/-
Pa Mangthianlal	-	Kangvai	- Rs. 100/-
Upa Kailiando	-	---do---	- Rs. 100/-
Rev. Kailum Vaiphei	-	---do---	- Rs. 100/-
Pa Kaigolal	-	---do---	- Rs. 200/-
Pa Thamuan	-	---do---	- Rs. 100/-
Pa Nengkholel	-	---do---	- Rs. 100/-
Nu Tingboi	-	---do---	- Rs. 100/-
Pa Kamminlun	-	---do---	- Rs. 100/-
Upa Kama	-	---do---	- Rs. 100/-
Upa Lalventhang	-	---do---	- Rs. 100/-

ZION THUSUAK

PATRON MEMBER

1. Pu Thangboi, Kohima
2. Nu Niangneu, HQ Veng
3. Nu Lily, T.Munjang
4. Nu Samboi Vanghoiphai

Patron members kum 3 (thum) 2020 apat Rs 1,000/- hita ahi.

-Editor Zion Thusuak

Collector/Magazine Agent

- | | |
|------------------------|--------------|
| 1. Tv. Joel | Hilltown |
| 2. Tv. Lawmthang | T. Munjang |
| 3. Pa Paelim | Kangvai |
| 4. Upa Tongjang | Imphal |
| 5. Nk. Jangneikim | Nakhujang |
| 6. Upa Manglun | S. Elimphai |
| 7. Upa S. Haupu | S. Kanan |
| 8. Pa Mangminlun | Gawtangkawt |
| 9. Nk. Hatshi | Jordanphai |
| 10.Tv. Hauginlian | Bewlahlane |
| 11.Nk. Paknu | Mualkon |
| 12.Tv. Khaimuan | Mantripukhri |
| 13.Pa Lenghau Phaltual | Vanghoiphai |



**Gamhawi. Leimakhong ah
RCG biakin mun ding suang-
phumna leh latna Rev.
Ngulneipau Moderator in anei
hun ahi.**



**Rapture /Second coming
lekhabu Hawнна Upa
Songlianthat Adm.
Secetary in anei pet ahi.**



**Rev.Dr.Kaitinkap Vaiphei Former
General Secretary ECCI in
Rapture/Second Coming lekha-
bu latna leh thugenna hun anei
pet ahi.**

BOOK POST

7a.

RNI Regd. No. 34293/80

.....
.....

Stamp

If undelivered please return to:
The Editor

ZION THUSUAK

RCG Office Hilltown, PO Box – 91
Churachandpur – 795128, Manipur

Email: Khupkamvaiphei@gmail.com

www.rcg.org.in

contact: +91 9612652209